



21. august 2009

UKA 2009/140

Inatsisartut Suleriaasianni § 32 naapertorlugu aalajangiiffigisassatut siunnersut imaattoq matumuuna saqqummiuppara:

**Aangjaarutininik atornerluisut katsorsartiffissaannik, taassumalu iluani inuusuttuinnarnut naatsorsuussamik immikkoortortaqaarnissaanik pilersitsinissamut Naalakkersuisut peqquneqaarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaqa Akitsinnguaq Olsen, Inuit Ataqatigiit)

### **Tungavilersuut:**

Hash-imik atornerluineq pillugu Inatsisartuni ilaasortap Olga P. Berthelsen-ip § 36 naapertorlugu apeqquaqarnerani Peqqissutsimut Naalakkersuisuusimasoq 24. marts 2009 ilaatigut ima akissuteqarpoq:

*"Hash-imik pujortartarnek nunatsinni atugaasorujussuuvoq, imigassamik atuinnermut akuliunneqakkajuttarluni. Hash-i ikiaroornartuuvoq sivisuumik atuinikkut qaratsamik ajoqusiisinnaasoq tarnikkullu napaateqalissutaasinnaasoq (hashpsykose), sivisuumik aammali sivikitsumik atuinikkut.*

*Politiit arsaarinnissutigisaat tunuliaqutaralugu nunatsinni hash-imik atuneq naliliiffigissagaanni hash innuttaasuni atugaasorujussuuvoq. 2007-imi politiit hash-i 48 kg-t missaaniittoq arsaarinnissutigaat 2008-mi 43 kg-t missaaniilluni. Tamatuma akerlianik ikiaroornartunik sakkortuunik atuneq nunatsinni killeqarpasippoq. Politiit isumaqarput ikiaroornartut sakkortuut, soorlu kokain, amfetamin assigisaalu ikittuinnaasut inunnillu ikittuinnarnit atornerqarlutik. Aammattaaq politiit isumaqarput ikiaroornartut sakkortuut nunatsinni nioqutaanngitsut. 2008-mi pingasoriarluni amfetamin-imik arsaarinnittoqarpoq – tamatigut inuit aalajangersimasut akornanni."*

Akissummi aamma takuneqarsinnaavoq meeqqat atuarfianni atuartut 15-17-inut ukiulinni apersorneqartuni 23%-it 2006-imi hash-imik pujortarsimasut. Qaammammilu kingullermi 15-17-inik ukiullit 8%-ii hash-imik pujortarsimallutik.

Hash-imilli atornerluisut inuusuttuinnaanngillat. Atornerluisut aamma inersimasortaqaqarput. Naalakkersuisut akissutaat qulaani issuarneqartoq naapertorlugu ukiuni 2005-2007 innuttaasuni misissuinerup takutippaa innuttaasuni inersimasut 33%-iisa ataasiarlutik imaluunniit ataasiaannaratik hash-i misilittarsimagaat, 23%-illu arlaleriaqalutik hash-i atornerluttarsimagaat.

Aamma ajornartorsiutaasup annertussusia eqqarsaatigalugu assersuutigalugu juli-p qaammataani 2009-mi umiatsiami hash-imik 118 kg-mik arsaarinnineq takuneqarsinnaavoq.

Ukiut ingerlanerini Paarisa hash-imik atornerluineq naamaarnerlu pillugit paasisitsiniasarsimavoq. Kiisalu hash-imik atornerluineq pinaveersaartinniarlugu suliniutit

Inuuneritta-mi suliassanut pingaarnernut ilaatinneqarput. Taamatut pinaveersaartitsiniarnermut suliniutit Inuit Ataqtigiinniit soorunami tapersersorneqarput. Avaqqussinnaanngilarpulli hash-imik atornerluisut qanoq ililluta pitsaanerusumik katsorsaasinnaanerat angusinnaaneripput eqqarsaatigissallugu.

Atornerluisunik katsorsaaneq taamaallaat atornerluisup katsorsarneqarnissaminik kissaateqarneratigut, aammalu atornerluisunut katsorsaaviup neqeroorutigisinnaasai atornerluisup atorfissaqartitaanut naleqquttuunerisigut iluatsissinnaavoq. Iluatsitsisumik angusaqartoqassappat atornerluisut inersimasut misilittagaqarluartut atornerluisullu inuusuttut aallarterlaat immikkoortinneqarnissaat pisariaqarluinnartut isumaqarfigininarpoq. Pineqartut taakku katsorsarneqarnissaminnut immikkut ittunik neqeroorfigineqarnissaat qularisariaqannigitsutut isumaqarnarpoq.

Takorlooruminarpormi katsorsaasoqarnermi atornerluisut inersimanerusut ukiorpaalunnilu atuisimasut peqatiganeri atornerluisunut inuusuttuaqqanut misigissutsigut inuttullu annikilliornartutut misigisimanarsinnaasut.

Atornerluisoq inuusuttoq atornerluisut misilittagaqarluartut akornanniinnermini nammineq atornerluinngitsutut misigisaqalersinnaanissaa navianarsinnaavoq – tamannami siunertaanngikkaluarmat.

Qaqiffimmi ullumikkut aanngajaarniutininik, ilaatigullu hash-imik, atornerluisunik katsorsaaniisaq neqeroorutigineqarpoq. Ilisimasalli naapertorlugit Qaqiffimmi inuusuttunut immikkut neqerooruteqartoqannigilaq, aammalu immikkoortortaqaarani. Tamassumalu saniatiatigut hash-imik atornerluisunik katsorsaaneq naliginnaasumik atornerluisunik katsorsaanermit kaputartuullugu ingerlanneqarpoq. Tamatumani imigassamik hash-imillu atornerluinerit ilaatigut ataatsimoortinneqartarnerat qularnanngitsumik pissutaavoq. Isumaqarpungali hash-imik atuinerujussuup katsorsaavimmik, pingaarnermik aanngajaarniutininik, tamatumani pingaarnertullugu hash-imik, atornerluisut katsorsaavissaannik pilersitsoqartariaqarnera pisariaqarluinnartoq.

Aamma taamaattumik katsorsaaveqalerneratigut hash-imik atornerluinerup navianassusaa innuttaasunut erseqqissaataasinnaavoq.

Aanngajaarniutininik atornerluisunuinnaq katsorsaavimmik pisortat ingerlassaannik pilersitsoqarnissaa taamaalillunga siunnersuutigaa.

Katsorsaaviit immikkoortut marluk, aappaa inersimasunut aappaalu inuusuttunut naatsorsuussat pilersinneqarnissaat tunngaviatigut pingaartinnerugaluarpara, katsorsaavinnulli marlunnut ilinniarsimasunik sulisussarsiorsinnaaneq ajornakusuussagunarmat, kiisalu pilersitsiniarnermi landskarsimit aningaasartuutissat killeqarsinnaanerit eqqarsaatigalugit, aammalu ingerlatsinikkut oqilisaataasinnaasut pingaartillugit katsorsaavimmik ataatsimik taama siunertalimmik pilersitsisoqarnissaa pissusissamisoortutut eqqarsaatiginarpoq.

Atornerluisut inuusuttut inersimasullu misilittagaqarnerusut ajunnginnerpaamik katsorsarneqarsinnaanissaat siunertaralugu tassunga atatillugu siunnersuutigissavarattaaq katsorsaavimmi atornerluisut inuusunnerusut eqqarsaatiginerullugit immikkoortortamik pilersitsisoqassasoq. Tamatumani katsorsaaviup avataani immikkut katsorsaaveqarnissaq eqqarsaatigineqarsinnaavoq.

Katsorsaavik siunnersuutigineqartoq akeqanngitsoornaviannigilaq, aningaasanullu inatsit aqutigalugulu nassaarineqartariaqassapput. Aningaasartuutissat amerlassusissaat

pineqartillugu apeqqutaassaaq katsorsaavik suliffiit illulluunniit pioreersut atorlugit aaqqissorneqarsinnaanersoq, kiisalu sulisussat qassit pisariaqartinneqassanersut.

Maannakkorpiarli tamakku ilisimatinnagit siunertamut aningaasat qaasserpiaat pisariaqartinneqassanersut oqaatigiuminaappoq. Taamaattorli katsorsaaviup siunnersuutigineqartup pilersinnissaata siunissaq eqqarsaatigalugu inuiaqatigiinnut iluaqutaanissaa qularinngilluinnarpara.

Siunnersuutigerusussavara siunnersuut manna siullermik Ilaqutariinnermut Ataatsimii-titaliamut imaluunniit Peqqissutsimut Ataatsimiititaliamut innersuunneqassasoq, tamatumani siunnersuutigineqartup aningaasatigut katsorsaanikkullu kingunerisinnaasaasa qulaajarneqarnissaat siunertaralugu.

Qulaajaanissamut atatillugu ataatsimiititaliat pineqartut aningaasartuutissat siunertamut pisariaqartinneqartussat tullerriaarnissaat ilanngullugit siunersuusiorsinnaajumaaraat naatsorsuutigaara.

Neriuutigaara Inatsisartuni partiit siunnersuutaasoq tapersorsorsinnaassagaat.